

三輔黃圖

(三)



三輔黃圖

西

三輔黃圖卷之三

長樂未央建章北宮甘泉宮中宮室臺殿

鴻臺秦始皇二十七年築高四十丈上起觀宇帝嘗射  
飛鴻于臺上故號鴻臺漢書惠帝四年長樂宮鴻臺災  
臨華殿在長樂宮前殿後武帝建漢書成帝永始四年  
長樂宮臨華殿災溫室殿按漢宮殿疏在長樂宮又漢  
宮閣記在未央宮

長信宮漢太后常居之按通靈記太后成帝母也后宮  
在西秋之象也秋主信故宮殿皆以長信長秋為名又  
永壽永寧殿皆后所處也成帝母王太后居長信宮

右長樂宮

宣室溫室清涼皆在未央宮殿北宣明廣明皆在未央  
殿東昆德玉堂皆在未央殿西

宣室未央前殿正室也淮南子曰周武王殺紂於宣室  
漢取舊名也漢書曰文帝受釐宣室夜半前席賈生問  
鬼神之事即此也又王莽地皇四年城中少年朱弟張  
魚等燒宮莽避火宣室前殿火輒隨之

溫室殿武帝建冬處之溫暖也西京雜記曰溫室以椒  
塗壁被之文繡香桂為柱設火齊屏風鴻羽帳視地以  
芻賓黠能漢書曰孔光為尚書令歸休與兄弟妻子燕  
語終不及朝省政事或問溫室省中樹何木光不應

京房奏考功課吏法上  
令公卿朝臣會議溫室

清涼殿夏居之則清涼也亦曰延清室漢書曰清室則中夏含霜即此也董偃常臥延清之室以畫石爲牀文如錦紫琉璃帳以紫玉爲盤如屈龍皆用雜寶飾之侍者於外扇偃偃曰玉石豈須扇而後涼邪又以玉晶爲盤貯冰於膝前玉晶與冰同潔侍者謂冰無盤必融濕席乃拂玉盤墜冰玉俱碎玉晶千塗國所貢也武帝以此賜偃

麒麟殿未央宮有麒麟殿漢書哀帝燕董賢父子於麒麟殿視賢曰吾欲法堯禪舜如何王閔曰天下乃高皇帝天下非陛下之天下也陛下奉承宗廟當傳之無窮安可妄有所授帝業至重天子無戲言上默然不悅

金華殿未央宮有金華殿漢書曰成帝初方向學召鄭寬中張禹說尚書論語於金華殿中

承明殿未央宮有承明殿著述之所也班固西都賦序云內有承明著作之庭即此也漢書武帝謂嚴助曰若厭承明之廬又成帝鴻嘉二年雉飛集承明殿屋

蒼龍白虎朱雀玄武天之四靈以正四方王者制宮闕殿閣取法焉

掖庭宮

在天子左右如肘膝

椒房殿在未央宮以椒和泥塗取其溫而芬芳也武帝時後宮八區有昭陽飛翔增城合歡蘭林披香鳳皇鴛鴦等殿後有增修安處常寧葆華椒風發越蔥草等殿

為十四位成帝趙皇后居昭陽殿昭陽殿在未央宮北以有女弟俱為婕妤貴傾後宮昭陽舍蘭房椒壁其中庭彤朱而庭上髹漆切皆銅沓切門也黃金塗白玉階壁帶往往為黃金缸函藍田璧明珠翠羽飾之自後宮未嘗有焉班婕妤好居增成舍後宮八區增成第二區也哀帝時董賢女弟為昭儀居舍號曰椒風

高門殿漢書曰汲黯請起高門注曰未央宮高門殿也又哀帝時鮑宣諫曰陛下擢臣巖穴誠冀有益毫毛豈欲臣美食大官重高門之地

非常室漢書成帝綏和二年鄭通里人工王褒絳衣小冠帶劍入北司馬門殿東門上前殿至非常室中殿名曰解

帷組結佩之召前殿署長業等曰天帝令我居此室

收縛考問乃故公車大誰卒病狂易不自知入宮下獄

死大誰者主問非常之人誰以誰何稱因用為官名也大誰長今此卒者長所領士卒也狂易謂病狂而易變

織室在未央宮又有東西織室織作文繡郊廟之服有令史

凌室在未央宮藏冰之所也幽詩七月篇曰納于凌陰

周官凌人職掌藏冰大祭祀飲食則供冰漢書惠帝四年織室凌室災

暴室主掖庭織作染練之署謂之暴室取暴曬為名耳有嗇夫官屬

弄田在未央宮弄田者燕遊之田天子所戲弄也漢書昭帝紀曰始元元年上耕于鈎盾弄田應劭注云帝時年九歲未能親耕帝籍鈎盾官宦者近署故往試耕爲戲弄成帝建始三年小女陳持弓年九歲闌入尚方掖門至未央殿鈎盾禁中

內謁者署在未央宮屬少府續漢書云掌宮中步帳藜物丁字漢官云令秩千石

金馬門宦者署武帝時大宛馬以銅鑄像立於署門因以爲名東方朔主父偃嚴安徐樂皆待詔金馬門即此路軫廐在未央宮中掌宮中輿馬亦曰未央廐漢書曰武帝時期門郎上官桀遷爲未央廐令

右未央宮

駘蕩宮春時景物駘蕩滿宮中也

馭娑宮馭娑馬行疾貌馬行迅疾一日之間過宮山言宮之大也

栲詣宮栲詣木名宮中美木茂盛也

天梁宮梁木至於天言宮之高也四宮皆在建章宮

竒華殿在建章宮旁四海夷狄器服珍寶火浣布切玉刀巨象大雀師子宮馬充塞其中

鼓簧宮漢宮閣疏云鼓簧宮周匝一百二十步在建章

宮西北

神明臺漢書曰建章有神明臺廟記曰神明臺武帝造

祭仙人甌上有承露盤有銅仙人舒手捧銅盤玉杯以承雲表之露以露和玉屑服之以求仙道長安記仙人掌大七圍以銅爲之魏文帝徙銅盤折聲聞數十里

### 右建章宮

壽宮北宮有神仙宮壽宮張羽旗設供具以禮神君神君來則肅然風生帷帳皆動

明光宮武帝太初四年秋起在長樂宮後南與長樂宮相連屬漢書元后傳曰成都侯商嘗疾欲避暑從上借明光宮蓋即此王莽建國元年改明光宮爲安館安定太后居之

太子宮甲觀太子宫有甲觀畫堂

漢書注曰甲者甲乙丙丁之次也 漢

書曰孝成皇帝元帝太子也母曰王皇后元帝在太子宮生甲觀畫堂元后傳曰見於丙殿此其例也畫堂謂宮殿中彩畫之堂

### 右北宮

鈎弋宮列仙傳曰鈎弋夫人姓趙氏河間人少好酒病卧六年右手鈎卷飲食少望氣者云東北有貴人推而得之見召姿色佳麗武帝反其手得玉鈎而手展有寵生昭帝姪娘十四月上曰聞昔堯十四月而生今鈎弋亦然乃命所生門曰堯母門所居曰鈎弋宮自夫人加婕妤後得罪掖庭獄死及殯香一月昭帝即位追尊爲皇太后更葬之發六十二萬人起陽陵其棺櫬但有彩



獲于襄雲陽記曰鈞弋夫人從至甘泉而卒尸香聞十餘里葬雲陽武帝思之起通靈臺於甘泉宮有一青鳥集臺上往來至宣帝時乃不至漢武故事曰鈞弋宮在直門之南

昭臺宮在上林苑中孝宣霍皇后立五年廢處昭臺宮後十二歲徙雲林館乃自殺

長定宮林光宮中有長定宮二輔決錄曰后從帝行幸於甘泉宮居長定宮孝成許皇后廢處昭臺宮歲餘徙長定宮

長門宮離宮在長安城孝武陳皇后得幸頗妬居長門宮

永信宮孝哀帝尊恭皇太后曰帝太后稱永信宮中安宮孝哀帝尊恭皇太后曰帝太后稱中安宮

儲元宮在長安城西漢書外戚傳曰信都太后與信都王俱居儲元宮

犬臺宮在上林苑中長安西二十八里漢書江充召見犬臺宮

葡萄宮在上林苑西漢哀帝元壽二年單于來朝以太歲厭勝所舍之此宮

步壽宮秦亦有步壽宮今按其地與秦異則秦漢各有步壽宮耳漢祿祿宮宣帝神爵二年鳳凰集祿祿宮鳳凰集處得玉寶乃起步壽宮

梁山宮梁山好時界卽禹貢云壺口治梁及岷又古公  
踰梁山于岐下及秦立梁山宮皆北山下也史記秦本  
紀始皇三十二年幸梁山宮卽此也

黃山宮在興平縣西二十里武帝微行西至黃山宮卽  
此也

回中宮史記秦始皇二十七年巡隴西北地出笄頭過  
回中漢書文帝十四年匈奴入蕭關殺都尉燒回中宮  
侯騎至雍武帝元狩四年幸雍通回中道遂北出蕭關  
又有二良宮相近

集靈宮集仙宮存仙殿存神殿望仙臺望仙觀俱在華  
陰縣界皆武帝宮觀名也華山記及二輔舊事云昔有

大元真人茅盈內記始皇三十一年九月庚子盈曾祖  
父濛於華山乘雲駕龍白日昇天先是邑人謠曰神仙  
得者茅初成駕龍上昇入大清時下玄州戲赤城繼世  
而往在我盈帝若學之臘嘉平漢武帝內傳曰魯女生  
長樂人初餌胡麻乃永絕穀八十餘年少壯色如桃華  
一日與親知故人別入華山後五十年先識者逢女於  
廟前乘白鹿從王母人因識之謝其鄉里而去又神仙  
傳曰中山衛叔卿常乘雲車駕白鹿見漢武帝將臣之  
叔卿不言而去武帝悔求得其子度今追其父登華岳  
見父與數人坐於石上敕度令還又華山記弘農鄧紹  
八月曉入華山見童子執五綵囊盛栢葉露食之武帝

即其地造宮殿歲時祈禱焉漢書云華陰縣有集靈宮  
又有望仙觀在華陰縣

棠梨宮在甘泉苑垣外雲陽南二十里

竹宮甘泉祠宮也以竹爲宮天子居中漢舊儀云竹宮  
去壇三里

宜春宮本秦之離宮在長安城東南杜縣東近下杜

扶荔宮在上林苑中漢武帝元鼎六年破南越起扶荔

宮宮以荔枝得名以植所得奇草異木菖蒲百本山薑十本甘

蕉十一本留求子十本桂百本密香指甲花百本龍眼

荔枝檳榔橄欖千歲子甘橘皆百餘本上木南北異宜  
歲時多植瘁荔枝自交趾移植百株于庭無一生者連

年猶移植不息後數歲偶一株稍茂終無華實帝亦珍

惜之一旦萎死守吏坐誅者數十人遂不復蒔矣其實  
則歲貢焉郵傳者疲斃於道極爲生民之患至後漢安

帝時交趾郡守極陳其弊遂罷其貢

五柞宮漢之離宮也在扶風盩厔宮中有五柞樹因以  
爲名五柞皆連抱上枝覆蔭數畝

宣曲宮在昆明池西孝宣帝曉音律常於此度曲因以  
爲名

鼎湖宮在湖城縣界又一說在盩厔有亭昔黃帝採首山銅以鑄

鼎鼎成有龍下迎帝仙去小臣攀龍髯而上者七十二  
人漢武帝於此建宮

思子宮武帝寤戾太子無辜被殺作思子宮爲歸來望  
思之臺於湖

萬歲宮武帝造汾陰有萬歲宮宣帝元康四年幸萬歲  
宮神爵翔集以元康五年爲神爵紀元

首山宮漢武帝元封元年封禪後夢高祖坐明堂朝羣  
臣於是祀高祖於明堂以配天還作首山宮以爲高靈  
館

明光宮武帝求仙起明光宮發燕趙美女二千人充之  
率取二十以下十五以上年滿三十者出嫁之掖庭令  
惣其籍時有死出者隨補之

池陽宮在池陽南上原之阪有長年阪去長安五十里  
養德宮趙王如意年幼未能就外傳戚姬使舊趙王內  
傳趙媼傳之號其室曰養德宮

### 右甘泉宮

日華宮河間獻王德築日華宮置客館二十餘區以待  
學士自奉養甚薄不踰賓客

曜華宮梁孝王好營宮室苑囿之樂作曜華宮築兔園  
園中有百靈山有霄寸石落猿巖栖龍岫又有鴈池池  
間有鶴洲鳧渚其諸宮觀相連延亘數十里奇果異樹  
珍禽怪獸畢有王日與宮人賓客弋釣其中

右日華曜華宮營構不在三輔然皆漢之諸  
王所建以附宮室篇末

漢畿內千里並京兆治之內外宮館一百四十五所班固西都賦云前乘秦嶺後越九峻東薄河華西涉岐雍宮館所歷百有餘區秦離宮二百漢武帝往往修治之

三輔黃圖卷之三

三輔黃圖卷之四

苑囿

周靈囿文王囿也詩曰王在靈囿麀鹿攸伏麀鹿濯濯  
白鳥鵲鵲毛苒注云囿所以域養禽獸也天子百里諸  
侯四十里靈者言文王之有靈德也靈囿言道行於苑  
囿也孟子曰文王之囿方七十里芻蕘者往焉雉兔者  
往焉與民同其利也文王靈囿在長安縣西四十二里

漢上林苑即秦之舊苑也漢書云武帝建元三年開上  
林苑東南至藍田宜春鼎湖御宿昆吾旁南山而西至  
長楊五柞北繞黃山瀕渭水而東周袤二百里離宮七  
十所皆容千乘萬騎漢宮殿疏云方三百四十里漢舊

儀云上林苑方三百里苑中養百獸天子秋冬射獵取  
之帝初修上林苑群臣遠方各獻名果異卉二千餘種  
植其中亦有製為美名以標奇異茂陵富民袁廣漢藏  
錘鉅萬家僮八九百人於北山下築園東西四里南北  
五里激流水注其中構石為山高十餘丈連延數里養

白鸚鵡紫鴛鴦犛牛青兕奇獸珍禽委積其間積沙為  
洲嶼激水為波濤致江鷗海鶴孕雛產鷖延漫林池奇  
樹異草靡不培植屋皆徘徊連屬重閣脩廊行之移晷  
不能徧也廣漢後有罪誅没入為官園鳥獸草木皆移  
入上林苑中上林苑有昆明觀武帝置又有蘭觀平樂

觀遠望觀燕昇觀觀象觀便門觀白鹿觀二爵觀陽祿

觀陰德觀鼎郊觀樛木觀椒唐觀魚鳥觀元華觀走馬  
觀拓觀上蘭觀郎池觀當路觀皆在上林苑又舊儀曰  
上林有令有尉禽獸簿記其名數又有上林詔獄主治  
苑中禽獸官館之事屬水衡又上林苑中有六池市郭  
宮殿魚臺犬臺獸圈

甘泉苑武帝置緣山谷行至雲陽二百八十一里西入  
扶風凡周回五百四十里苑中起宮殿臺閣百餘所有  
仙人觀石闕觀封巒觀鳩鵲觀

御宿苑在長安城南御宿川中漢武帝為離宮別館禁  
禦人不得入往來遊觀止宿其中故曰御宿三秦記云  
御宿園出栗十五枚一勝大梨如五勝落地則破其取

黎先以布囊承之號曰含消此園梨也

思賢苑孝文帝為太子立思賢苑以招賓客苑中有堂  
室六所客館皆廣蕪高軒屏風幃褥甚麗廣陵王胥有  
勇力常於別園學格熊後遂能空手搏之莫不絕脰後  
為獸所傷陷腦而死

博望苑武帝立子據為太子為太子開博望苑以通賓  
客漢書曰武帝年二十九乃得太子甚喜太子冠為立  
博望苑使之通賓客從其所好又云博望苑在長安城  
南杜門外五里有遺址

西郊苑漢西郊有苑園林麓藪澤連亘繚以周垣四百  
餘里離宮別館二百餘所

三十六苑漢儀注大僕牧師諸苑二十六所分布北邊西邊以郎為苑監宦官奴婢三萬人養馬三十萬疋養鳥獸者通名為苑故謂之牧馬廐為苑

樂遊苑在杜陵西北宣帝神爵三年春起

宜春下苑在京城東南隅元帝紀注東南隅此地是梨園雲陽宮記

曰雲陽車箱坂下有梨園一頃梨數百株青翠繁密望之如車蓋

### 池沼

周文王靈沼在長安西三十里詩曰王在靈沼於物魚躍

漢昆明池武帝元狩四年穿在長安西南周回四里西

南夷傳曰天子遣使求身毒國市竹身毒國即天竺也漢書曰張騫言使

天子欲伐之越雋昆明國有滇池方三百里故作昆明

池以象之以習水戰因名曰昆明池漢書曰元狩三年

乃大修昆明池也三輔舊事曰昆明池地三百三

十二頃中有戈舩各數十樓舩百艘舩上建戈矛四角

悉垂幡旄葆麾蓋照燭涯浹圖曰上林苑有昆明池周

匝四十里廟記曰池中後作豫章大舩可載萬人上起

宮室因欲遊戲養魚以給諸陵祭祀餘付長安厨三輔

故事又曰池中有豫章臺及石鯨刻石為鯨魚長三丈

每至雷雨常鳴吼鬣尾皆動一說甘泉宮南有昆明池

大夏時見蜀布印竹枝間所從來曰從東來身毒國可數千里得蜀賈人市

而為昆明所

戎卒之半及吏弄

法者滿之穿此池

初逐

戎龍西北地

上

戰

逐

水

戰

逐

水



池中有靈波殿皆以桂爲殿柱風來自香又曰池中有

龍首舩常令宮女泛舟池中張鳳蓋爲飾建華旗作權

歌權歌權發歌也又曰權歌詭辨人歌也雜以鼓吹帝御豫章觀臨觀焉

關輔古語曰昆明池中有二石人立牽牛織女於池之

東西以象天河張衡西京賦曰昆明靈沼黑水玄址牽

牛立其右織女居其左今有石父石婆神祠在廢池疑

此是也武帝初穿池得黑土帝問東方朔東方朔曰西

域胡人知乃問胡人胡人曰劫燒之餘灰也三秦記曰

昆明池中有靈沼名神池云堯時治水嘗停舩於此池

通白鹿原原人釣魚綸絕而去夢於武帝求去其鈎三

日戲於池上見大魚嚙索帝曰豈不穀昨所夢邪乃取

重音

鈎放之間三日帝復遊池池濱得明珠一雙帝曰豈昔

魚之報邪

鎬池在昆明池之北即周之故都也廟記曰長安城西

有鎬池在昆明池北周匝二十二里既地三十三頃史

記曰秦始皇帝三十六年使者從關東夜至華陰縣平

舒道有人持璧遮使者曰爲吾遺鎬池君因言曰今年

祖龍死使者問其故忽不見置其璧去使者奉璧具以

聞始皇默然良久曰山鬼不過知一歲事退言曰祖龍

者人之先也祖始也龍者人主之象謂始皇也使御府視璧乃二十八

年渡江所沉璧也

滄池在長安城中舊圖云未央宮有滄池言池水蒼色

故曰滄池

大液池在長安故城西建章宮北未央宮西南大液者  
言其津潤所及廣也閔輔記云建章宮北有池以象北  
海刻石為鯨魚長三丈漢書曰建章宮北治大池名曰  
太液池中起三山以象瀛洲蓬萊方丈刻金石為魚龍

奇禽異獸之屬

瀛洲一名鬼洲亦曰環洲有樹名影木  
月中視之如列星萬歲一實食之輕骨

上有枝葉如華蓋群仙以避風雨有金鑿之觀飾以環  
玉直上於雲中有青瑤瓦覆之以雲紉之素刻碧玉為  
倒龍之狀懸火精為日刻黑玉為鳥以水精為月青瑤  
為蟾兔於地下為機戾以則昏明不虧弦望有香風冷  
然而至有草名芸苗狀如蒿蒲食葉則醉食根則醒有  
鳥如鳳身紺翼丹名曰藏珠每鳴翔而吐珠累斛仙人  
以珠飾仙裳蓋輕而耀於日月也蓬萊山亦名防丘亦  
名雲來高二万里廣七万里水淺有細石如金玉得之  
不加陶冶自然光淨仙者服之東有鬱夷國時有金霧  
諸仙說北上常浮轉低仰有如山上架樓室向明以開

戶牖及霧散威戶皆向北有浮雲之幹赤鳥坐紫子大  
如珠有青鸞集其上下有砂磔細如粉柔風至葉條翻  
起拂細砂如雲霧仙者來觀而戲焉風吹竹葉聲如鐘  
磬方丈之山一名岱維東方龍場方千里瑤玉為林雲  
色皆紫上有通霞臺西王母常遊於其上常有鸞鳳鼓  
舞如琴瑟和鳴三山統名崑丘亦曰神山上有不死之  
藥食之輕辛武帝信仙道取少君栾大妄誕之語廟記  
多起樓觀故池中立三山以象蓬萊瀛洲方丈

曰建章宮北池名太液周回十頃有採蓮女鳴鶴之舟  
又按三輔舊事云日出暘谷浴於咸池至虞淵即暮此

池象之也昭帝始元元年春黃鵠下建章宮太液池成  
帝常以秋日與趙飛燕戲於太液池以沙棠木為舟

木造舟以雲母飾於鵠首一名雲舟又刻大桐木為虬

龍彫飾如真夾雲舟而行以紫桂為柁柁及觀雲棹之  
玩擷菱蕖帝每憂輕蕩以驚飛燕命攸飛之士以金鎖

纒雲舟於波上每輕風時至飛鷺始欲隨風入水帝以翠縷結飛鷺之裾常恐曰妾微賤何復得預結縷裾之遊今太液池尚有避風臺即飛燕結裾之處

唐中池周回十二里在建章宮太液池之南

百子池戚夫人侍兒賈佩蘭後出爲扶風人段儒妻說在宮內時見戚夫人侍高祖嘗以趙王如意爲言而高祖思之幾半日不言歎息悽愴而未知其術使夫人擊筑高祖歌大風以和之七月七日臨百子池作于闐樂樂闕以五色縷相羈謂之相連愛八月四日出彫房北戶竹下圍棊勝者終年有福負者終年疾病取絲縷就北斗星辰求長命乃免正月上辰出池邊盥濯食蓬餌以祓妖邪三月上巳張樂於池上

十池上林苑有初池麋池牛首池崩池積草池東陂池西陂池當路池大臺池郎池牛首池在上林苑中西頭崩池生崩草以織席西陂池郎池皆在百城南上林苑中陂郎一水名因爲池積草池中有珊瑚樹高一丈二尺一本三柯上有四百六十二條南越王趙佗所獻號爲烽火樹至夜光景常煥然

少府飲飛外池漢儀注飲飛具繒繳以射鳧鴈給祭祀故有池

秦酒池在長安故城中廟記曰長樂宮中有魚池酒池池上有肉炙樹秦始皇造漢武行舟於池中酒池北起

臺天子於上觀牛飲者三千人又曰武帝作以夸羌胡  
飲以鐵盃重不能舉皆抵牛飲西征賦云酒池監於商  
辛追覆車而不悟

影蛾池武帝鑿池以翫月其旁起望鵠臺以眺月影入  
池中使宮人乘舟弄月影名影蛾池亦曰眺蟾臺

琳池昭帝元始元年穿琳池廣千步池南起桂臺以望  
遠東引大液之水池中植分枝荷一莖四葉狀如駢蓋  
日照則葉低蔭根莖若葵之衛足名曰低光荷實如玄  
珠可以飾佩花葉難萎芬馥之氣徹十餘里食之令人  
口氣常香益脉治病宮人貴之每遊燕出入必皆含嚼  
或剪以爲衣或折以障日以爲戲弄帝時命水嬉遊燕  
永日士人進一豆槽帝曰桂楫松舟其猶重朴况乎此  
槽可得而乘耶乃命以文梓爲船木蘭爲柁刻飛燕翔  
鶴飾於船首隨風輕漾畢景忘歸起商臺於池上  
鶴池在長安城西盤池在西北並廢  
冰池在長安西舊圖云西有彪池亦名聖女泉蓋冰彪  
聲相近傳說之訛也



